

Na osnovu člana 9. Zakona o Gradu Srebrenik („Službene novine Federacije Bosne i Hercegovine“, broj 30/19), člana 13. Zakona o principima lokalne samouprave u Federaciji Bosne i Hrečegovine („Službene novine Federacije Bosne i Hercegovine“, broj: 49/06 i 51/09) i u skladu s Odlukom o proglašenju Grada Srebrenik („Službeni glasnik Općine Srebrenik“, broj: 7/17), Gradsko vijeće Grada Srebrenik, na 1. sjednici održanoj dana 12.07.2019. godine, donijelo je:

PRIVREMENI STATUTARNU ODLUKU GRADA SREBRENIK

I OPĆE ODREDBE

Član 1.

Ovom Odlukom se privremeno, u skladu sa Zakonom o Gradu Srebrenik (u daljem tekstu: Zakon), do donošenja Statuta Grada Srebrenik, uređuje uspostava i organizacija gradskih organa, način njihovog rada, primjena dosadašnjih propisa Općine Srebrenik, status, obilježja Grada i druga pitanja od značaja za organizaciju i funkcionisanje Grada Srebrenik (u daljem tekstu: Grad).

Član 2.

Grad obuhvata teritoriju (područje) dosadašnje Općine Srebrenik koju čine sva naseljena mjesta, koja se, prema evidenciji Federalnog zavoda za statistiku, nalaze u okviru Općine Srebrenik na dan stupanja na snagu Zakona o Gradu Srebrenik.

Član 3.

Grad je jedinica lokalne samouprave i ima svojstvo pravnog lica.

Sjedište Grada je u Srebreniku, Ulica Varoških polja b.b.

Član 4.

Grad je pravni sljednik Općine Srebrenik i preuzima nadležnosti, prava, obaveze i imovinu Općine Srebrenik.

Grad preuzima od Općine Srebrenik: grb, zastavu i druga važeća obilježja Općine Srebrenik.

Dan Općine Srebrenik – 21. juni obilježavat će se kao Dan Grada Srebrenik.

Član 5.

Grad ima pečat.

Oblik, sadržaj, izrada pečata, čuvanje i upotreba pečata regulisat će se posebnom odlukom Gradskog vijeća.

II ORGANI GRADA

Član 6.

Organii Grada su Gradsko vijeće i Gradonačelnik, koji svoje funkcije vrše u skladu s Ustavom Bosne i Hercegovine, Ustavom Federacije Bosne i Hercegovine, Ustavom Tuzlanskog kantona, zakonom, Statutom i ovom Odlukom.

1. Gradsko vijeće

Član 7.

Gradsko vijeće Grada je predstavnički organ građana Grada Srebrenik i organ lokalne samouprave izabran na temelju općeg biračkog prava na neposrednim izborima tajnim glasanjem, na način određen zakonom.

Gradsko vijeće je organ odlučivanja koji donosi opće i druge akte u okviru samoupravnog djelokruga grada, te obavlja druge poslove u skladu s aktima iz člana 6. ove Odluke.

Član 8.

Gradsko vijeće ima 29 vijećnika, od kojih najmanje jedan vijećnik treba biti iz reda nacionalnih manjina.

Ukoliko se ne dodijeli mandat pripadniku nacionalne manjine, taj mandat ostaje upražnjen.

Vijećnici Gradskog vijeća vrše svoje dužnosti prema svom slobodnom uvjerenju na dobrobit svih građana Grada, a odgovorni su za ustavnost i zakonitost akata koje donosi Gradsko vijeće.

Član 9.

Gradsko vijeće u okviru svojih nadležnosti:

1. donosi Statut Grada dvotrećinskom većinom glasova;
2. donosi odluke i druge opće akte kojima uređuje pitanja iz samoupravnog djelovanja Grada;
3. donosi budžet Grada, usvaja godišnji izvještaj o izvršenju budžeta kao i odluku o privremenom finansiranju, u skladu sa zakonom;
4. utvrđuje politiku Grada u okviru nadležnosti Grada i prati njeno ostvarivanje;
5. donosi razvojne, prostorne i urbanističke planove i programe, te provedbene planove, uključujući zoniranje;
6. donosi propise o porezima, taksama, naknadama i doprinosima Grada u skladu sa zakonom;
7. donosi odluke o upravljanju i raspolažanju imovinom Grada;
8. donosi odluke o zaduživanju Grada, o raspisivanju javnog zajma i davanju jamstva u skladu sa zakonom;
9. donosi programe uređenja gradskog građevinskog zemljišta;
10. donosi plan korištenja javnih površina;

11. donosi odluke o organizaciji mjesne samouprave i nazivima ulica, trgova i naseljenih mjesto;
12. donosi odluke o udruživanju Grada u saveze i druge oblike organizovanja, te o trajnom uspostavljanju prijateljske i druge saradnje s lokalnim i regionalnim zajednicama drugih država;
13. donosi odluke o proglašenju praznika Grada;
14. donosi odluke o priznanjima i nagradama Grada;
15. donosi odluke o raspisivanju referenduma i sazivanju zborova mjesnih zajednica;
16. bira i razrješava predsjedavajućeg i zamjenika predsjedavajućeg Gradskog vijeća;
17. osniva radna tijela Gradskog vijeća, te imenuje i razrješava njihove članove;
18. imenuje, bira i razrješava druge osobe određene zakonom, Statutom i odlukama Vijeća, te daje saglasnost na imenovanja, izbor i razrješenja, kada je to propisano;
19. osniva stručnu službu Gradskog vijeća;
20. osniva preduzeća i ustanove i druga pravna lica za obavljanje komunalnih, društvenih, privrednih i drugih djelatnosti od interesa za Grad, te odlučuje o njihovim statusnim promjenama u skladu sa zakonom;
21. odlučuje o prestanku ustanova i drugih pravnih lica u skladu sa zakonom;
22. odlučuje o prijenosu i preuzimanju osnivačkih prava u skladu sa Statutom i ovom Odlukom;
23. razmatra godišnji izvještaj o provođenju gradske politike i aktivnostima gradonačelnika;
24. pokreće i razmatra inicijativu za pokretanje postupka opoziva gradonačelnika i donosi odluke o pokretanju postupka opoziva gradonačelnika;
25. ocjenjuje rad ustanova i kvalitet usluga u djelosti zdravstva, socijalne zaštite, obrazovanja, kulture i sporta, najmanje jednom godišnje, te osigurava finansijska sredstva za unapređenje njihovog rada i kvaliteta usluga u skladu sa potrebama stanovništva i mogućnostima Grada;
26. donosi pojedinačne i druge akte iz samoupravnog djelokruga u skladu sa zakonom, Statutom i ovom Odlukom;
27. analizira stanje javnog reda i mira, sigurnost ljudi i imovine najmanje jednom godišnje, te predlaže mјere prema nadležnim organima;
28. utvrđuje smjernice za vodenje kadrovske politike u skladu sa zakonom;
29. donosi poslovnik o svom radu;
30. donosi plan odbrane Grada i svoj plan odbrane;
31. utvrđuje koeficijente za obračun plaća za:
 - gradonačelnika,
 - državne službenike i namještenike u gradskim službama i Stručnoj službi Gradskog vijeća
 - gradskog pravobranioca i zamjenika gradskog pravobranioca;
 - državne službenike i namještenike u Gradskom pravobranilaštvu;
32. obavlja i druge poslove utvrđene zakonom i Statutom odnosno ovom Odlukom.

2. Gradonačelnik

Član 10.

Gradonačelnik je nosilac izvršne vlasti Grada.

Gradonačelnik se bira neposredno na način i po postupku utvrđenom zakonom.

Mandat gradonačelnika traje četiri godine i vezan je za mandat saziva Gradskog vijeća.

Mandat gradonačelnika izabranog na prijevremenim izborima teče do redovnog isteka mandata Gradskog vijeća.

Gradonačelnika za vrijeme privremene odsutnosti ili spriječenosti zamjenjuje dužnosnik ili djelatnik gradskih organa uprave odnosno službi za upravu, kojeg on ovlasti.

Dužnost gradonačelnika, u slučaju prestanka mandata prije isteka vremena na koje je izabran, do ponovnog izbora gradonačelnika vrši osoba izabrana od Gradskog vijeća natpolovičnom većinom od ukupnog broja članova Gradskog vijeća.

Član 11.

Gradonačelnik, kao nosilac izvršnih poslova u okviru samoupravnog djelokruga Grada, u okviru svoje nadležnosti:

1. predstavlja i zastupa Grad;
2. osigurava izvršavanje odluka i drugih akata Gradskog vijeća i odgovora za njihovo provođenje;
3. izrađuje i Gradskom vijeću na usvajanje podnosi nacrt i prijedlog budžeta Grada;
4. odgovoran je za izvršavanje budžeta Grada;
5. obavlja upravljački nadzor nad zakonitošću rada javnih ustanova i preduzeća kojim je osnivač Grad, te im daje upute za rad;
6. donosi akte iz svoje nadležnosti;
7. predlaže odluke i druge akte Gradskom vijeću;
8. obezbjeđuje izradu i Gradskom vijeću podnosi na usvajanje: ekonomске planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
9. provodi politiku Grada u skladu sa odlukama Gradskog vijeća;
10. izvršava zakone i druge propise čije je izvršavanje povjereno Gradu;
11. utvrđuje organizaciju službi za upravu i drugih službi Grada;
12. donosi pravilnik o unutrašnjoj organizaciji gradskih službi;
13. realizira saradnju Grada sa drugim gradovima, općinama, međunarodnim i drugim organizacijama u skladu sa odlukama i zaključcima Gradskog vijeća i njegovih radnih tijela;
14. podnosi izvještaj Gradskom vijeću o ostvarivanju politike Grada i svojim aktivnostima;
15. odlučuje o pitanjima iz radnog odnosa zaposlenika u skladu sa zakonom;
16. brine se o zakonitom i pravodobnom obavljanju poslova iz nadležnosti gradskih službi i poduzima mjere za osiguranje njihovog efikasnijeg rada;
17. sklapa ugovore i druge pravne poslove u skladu sa zakonom, Statutom i odlukama Gradskog vijeća;
18. obavlja i druge poslove utvrđene zakonom, drugim propisima, Statutom i ovom Odlukom.

Član 12.

Gradonačelnik je odgovoran za ustavnost i zakonitost akata koje donosi, kao i akata koje predlaže Gradskom vijeću.

Član 13.

Međusobni odnosi Gradskog vijeća i Gradonačelnika zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje i razvoj Grada.

III MJESNA SAMOUPRAVA

Član 14.

Mjesna samouprava u Gradu se ostvaruje u mjesnoj zajednici, kao obaveznom obliku mjesne samouprave, koju Gradsko vijeće osniva svojom odlukom.

Član 15.

Mjesna zajednica nadležna je za obavljanje poslova značajnih za život i rad građana na području mjesne zajednice, te građani putem organa mjesne zajednice odlučuju o tim poslovima, a naročito:

- pokreću i učestvuju u javnoj raspravi kod pripreme i donošenja urbanističkih planova na području mjesne zajednice, pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
- pokreću i učestvuju u raspravama o inicijativama i aktivnostima za razvoj privrede i društvenih djelatnosti;
- brinu o zaštiti osoba kojima je potrebna pomoć i u tu svrhu pokreću saradnju sa stručnim organima u oblasti socijalne zaštite;
- staraju se o razvoju kulture i sporta i stvaraju uvjete za dostupnost ustanova i objekata kulture i sporta svim građanima, a pogotovo mladima;
- stvaraju uvjete i preduzimaju mjere za očuvanje i zaštitu prirodnih i radom ostvarenih vrijednosti čovjekove sredine;
- organizira, provodi i odgovorna je za mjere zaštite i spašavanja ljudi i materijalnih dobara od prirodnih i drugih nesreća;
- drugim poslovima utvrđenim ovom Odlukom i statutom mjesne zajednice, vodeći računa o vrsti i obimu potreba, raspoloživim sredstvima, kao i interesima građana u cjelini.

Član 16.

Mjesna zajednica ima svojstvo pravnog lica u okviru prava i dužnosti utvrđenih Statutom i odlukom o osnivanju.

Član 17.

Poslovi iz djelokruga mjesne zajednice, organi mjesne zajednice, postupak izbora, organizacija i rad organa mjesne zajednice, način njihovog odlučivanja, te druga pitanja od značaja za rad i funkcioniranje mjesne zajednice uređuju se statutom mjesne zajednice, koji mora biti u skladu sa Statutom Grada.

IV GRADSKE SLUŽBE ZA UPRAVU, STRUČNE I DRUGE SLUŽBE

Član 18.

Poslove lokalne samouprave i uprave iz djelokruga Grada, kao i poslove uprave koje su viši nivoi vlasti (kantonalni i federalni) prenijeli na Grad obavlja gradski organ uprave, na način utvrđen zakonom.

Gradski organi uprave su gradske službe za upravu.

Gradske službe za upravu mogu se osnivati u okviru jedinstvenog gradskog organa uprave.

Gradske organe uprave osniva i njihov djelokrug utvrđuje odlukom Gradske vijeće, na prijedlog Gradonačelnika, ako zakonom nije drugačije određeno.

Član 19.

Za obavljanje stručnih, zajedničkih i drugih poslova za potrebe Gradskog vijeća, Gradonačelnika, gradskih službi za upravu i drugih organa, mogu se osnivati stručne, tehničke i druge službe kao zajedničke ili samostalne službe.

Službe iz prethodnog stava ovog člana za potrebe Gradskog vijeća osniva Gradsko vijeće, a za potreba Gradonačelnika, gradskih službi za upravu i drugih organa osniva posebnom odlukom Gradonačelnik, u skladu sa zakonom.

Član 20.

Unutrašnja organizacija gradskog organa uprave uređuje se pravilnikom o unutrašnjoj organizaciji koji donosi Gradonačelnik, u skladu sa zakonom.

Pravilnikom iz prethodnog stava ovog člana uređuje se: organizacija gradskog organa uprave, djelokrug rada gradskih službi za upravu, rukovođenje gradskim organom uprave, unutrašnja organizacija gradskih službi i djelokrug rada unutrašnjih organizacionih jedinica, sistematizacija radnih mjesta, odgovornost za obavljanje poslova i zadatka, radna mjesta sa posebnim ovlaštenjima, te druga pitanja od značaja za organizaciju, rad i funkcionisanje jedinstvenog gradskog organa uprave Grada Srebrenik.

Član 21.

Gradski organi uprave, u skladu sa zakonom, Statutom i ovom Odlukom neposredno obavljaju sljedeće upravne i druge stručne poslove:

1. izvršavaju propise i druge opće akte iz samoupravnog djelokruga Grada;

2. izvršavaju zakone, druge propise i opće akte, prate stanje i provode utvrđenu politiku u oblastima iz njihove nadležnosti u skladu sa važećim federalnim i kantonalnim zakonima i drugim propisima;

3. rješavaju u upravnom postupku o pravima, obavezama i pravnim interesima građana i pravnih osoba iz samoupravnog djelokruga Grada;

4. obavljaju nadzor nad djelatnošću javnih poduzeća i ustanova koje obavljaju poslove na osnovu javnih ovlasti utvrđenih propisima Grada;

5. daju inicijative za rješavanje određenih pitanja iz samoupravnog djelokruga Grada;

6. pripremaju nacrte propisa i drugih općih i pojedinačnih akata iz svoje nadležnosti;

7. obavljaju i druge poslove određene Statutom odnosno ovom Odlukom i drugim gradskim propisima.

Pored poslova iz prethodnog stava ovog člana, gradski organi uprave obavljaju i upravne i druge stručne poslove, koji su federalnim zakonom odnosno zakonom Kantona preneseni na Grad.

V PRIJELAZNE I ZAVRŠNE ODREDBE

Član 22.

Općinsko vijeće Srebrenik i radna tijela Općinskog vijeća Srebrenik, konstituisani nakon Lokalnih izbora 2016. godine, nastavljaju sa radom kao Gradsko vijeće i radna tijela Gradskog vijeća sa nadležnostima utvrđenim važećim propisima i ovom Odlukom sve do okončanja prvih narednih lokalnih izbora u skladu sa zakonom.

U slučaju prijevremenog prestanka mandata vijećnika iz sadašnjeg saziva Vijeća, vijećnik kojem Centralna izborna komisija Bosne i Hercegovine dodijeli mandat, u skladu sa Izbornim zakonom Bosne i Hercegovine, kao sljedećem kandidatu sa liste političkog subjekta na Lokalnim izborima 2016. godine, dat će i potpisati svečanu izjavu sljedeće sadržine:

„Svečano izjavljujem da će povjerenu dužnost vijećnika Gradskog vijeća Srebrenik obavljati savjesno i odgovorno, da će se pridržavati Ustava Bosne i Hercegovine, Ustava Federacije Bosne i Hercegovine, Ustava Tuzlanskog kantona, zakona i Statuta, zalagati se za ljudska prava i slobode, razvoj demokratije i da će u svim prilikama štititi interes države Bosne i Hercegovine, Federacije Bosne i Hercegovine, Tuzlanskog kantona, Grada Srebrenik i ravnopravnost naroda i građana.“

Član 23.

Na rad Gradskog vijeća i njegovih radnih tijela primjenjivat će se odredbe važećeg Poslovnika o radu Općinskog vijeća Općine Srebrenik-prečišćen tekst (“Službeni glasnik Općine Srebrenik”, broj:10/06, 2/10, 8/11, 2/17 i 7/17), ako nisu u suprotnosti sa odredbama Zakona o Gradu Srebrenik i odredbama ove Odluke.

Eventualna sporna pitanja, koja nisu uređena Poslovnikom iz prethodnog stava ovog člana, regulisat će se zaključkom Gradskog vijeća na sjednici na kojoj se pojavi sporno pitanje.

Član 24.

Osobe izabrane ili imenovane od strane Općinskog vijeća nastavljaju sa radom u Gradu Srebrenik do isteka mandata na koji su izabrani ili imenovani, osim u slučaju da podnesu ostavku ili budu razriješeni na način i po postupku propisanim zakonom.

Član 25.

Općinski načelnik Općine Srebrenik, koji je neposredno izabran na Lokalnim izborima 2016. godine, nastavlja sa radom kao gradonačelnik sa nadležnostima utvrđenim važećim propisima i ovom Odlukom sve do okončanja prvih narednih neposrednih izbora za Gradonačelnika u skladu sa zakonom.

Član 26.

Općinske službe za upravu i drugi općinski organi i službe (u daljem tekstu: općinski organi) nastavljaju sa radom kao gradske službe za upravu i drugi gradski organi i službe (u daljem tekstu: gradski organi) prema djelokrugu utvrđenom posebnom odlukom i drugim općinskim propisima.

Poslove, arhivu, dokumentaciju, kao i službenike i namještenike općinskog organa uprave iz stava 1. ovog člana, preuzet će gradski organi danom stupanja na snagu ove Odluke.

Javna preduzeća i javne ustanove čiji je osnivač Općina nastavljaju sa radom kao javna preduzeća i ustanove Grada Srebrenik.

Općinsko pravobranilaštvo nastavlja sa radom kao Gradsko pravobranilaštvo.

Postojeći organi mjesnih zajednica nastavljaju s radom do izbora novih organa mjesne zajednice, na način i po postupku utvrđenim Statutom Grada odnosno ovom Odlukom i općim aktima mjesne zajednice.

Član 27.

Gradsko vijeće će donijeti Statut Grada u roku od 12 mjeseci od dana stupanja na snagu ove Odluke.

Do donošenja Statuta Grada primjenjivat će se odredbe Statuta Općine Srebrenik („Službeni glasnik Općine Srebrenik“, broj: 1/08), koje nisu u suprotnosti sa Zakonom o Gradu Srebrenik i ovom Odlukom.

Član 28.

Važeći propisi Općine Srebrenik kojima se uređuju pitanja iz nadležnosti Grada, a koji su na snazi na dan donošenja ove Odluke, nastavljaju se primjenjivati do donošenja gradskih propisa, ako nisu u suprotnosti sa Zakonom o Gradu Srebrenik i ovom Odlukom.

Član 29.

Odluke i druga akta Gradskog vijeća i drugih organa Grada nastavljaju se objavljivati u Službenom glasniku Grada Srebrenik.

Član 30.

Najkasnije u roku od 90 dana od dana stupanja na snagu ove Odluke, izvršit će se registracija Grada Srebrenik kod nadležnih organa, te promjena memoranduma, tabli, pečata i druge radnje neophodne za funkcionisanje Grada.

U roku iz stava 1. ovog člana javna preduzeća i ustanove, te drugi organi čiji je osnivač Općina, izvršit će promjenu memoranduma, tabli i pečata, promjene u sudskom registru i druge radnje u cilju usklađivanja sa odredbama ove Odluke.

Član 31.

Ova Odluka se donosi dvotrećinskom većinom glasova od ukupnog broja vijećnika u Gradskom vijeću.

Odluka iz prethodnog stava donosi se javnim glasanjem.

Član 32.

Danom stupanja na snagu ove Odluke prestaje primjena onih odredaba Odluke o proglašenju Grada Srebrenik („Službeni glasnik Općine Srebrenik“, broj: 7/17), kao i odredbe drugih propisa Općine Srebrenik koje su u suprotnosti sa odredbama ove Odluke.

Član 33.

Odluka stupa na snagu danom objavljivanja u „Službenom glasniku Grada Srebrenik“, a objavit će se i na web stranici Grada Srebrenik.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD SREBRENIK
-Gradsko vijeće-

PREDSJEDAVAJUĆI
GRADSKOG VIJEĆA
Anto Marković, s.r.

Broj: 01- 414/19
Datum, 12.07.2019. godine